

禮記通解

禮記通解卷八

郝敬習

禮運第九

禮數升降有古今。聖王制作有妙用之謂運。運者言乎其不可見者也。自文王世子前諸篇多載古禮。此與下篇極言因應變通。自然無文之旨。有精義。有名言。其出入之過。或浸淫于老莊而文辭浩汗。不似聖人典要之言。讀者不可不辨也。通篇皆爲夫子與子游語。篇首至小康。夫子爲道不行發嘆言。偃復問。至禮天下國家可得而正。明禮之用。急又言偃復問。至禮

之大成明禮所由起。孔子曰：嗚呼哀哉！至末明所以嘆息之意。

昔者仲尼與於蜡。作賓事畢，出遊於觀。去聲之上，喟然而嘆。仲尼之嘆，蓋嘆魯也。言偃在側曰：君子何嘆？孔子曰：大道之行也，與三代之英，丘未之逮也，而有志焉。大道之行也，天下爲公，選賢與能，講信脩睦，故人不獨親其親，不獨子其子，使老有所終，壯有所用，幼有所長，矜寡孤獨廢疾者皆有所養。男有分，女有歸，貨惡其棄於地也，不必藏於己；力惡其不出於身也，不必爲己。是故謀閉而不興，盜竊亂賊而不作，故外戶而不閉，是謂大同。

今大道既隱。天下爲家。各親其親。各子其子。貨力爲己。大人世及以爲禮。城郭溝池以爲固。禮義以爲紀。以正君臣。以篤父子。以睦兄弟。以和夫婦。以設制度。以立田里。以賢勇知。以功爲己。故謀用是作。而兵由此起。禹湯文武成王周公。由此其選也。此六君子者。未有不謹於禮者也。以著其義。以考其信。著有過刑。仁講讓。示民有常。如有不由此者。在勢者去。衆以爲殃。是謂小康。

蜡。祭名。蜡者。索也。歲終大索。百神而祭之也。賓。助祭之賓。時夫子仕于魯。故與于蜡賓。觀魯闕門。所謂雉門之兩觀也。嘆魯者。嘆魯禮之衰也。言偃。子游姓名。

大道指上皇之世。三代之英。謂中古也。未之逮。言不及見也。天下爲公。不以傳子也。選賢與能。謂傳賢也。講信脩睦。所講習脩爲者。誠信和睦之事也。男有分。有職業。女有歸。有依託也。百物之財。但惡其狼戾不收。而不必皆已收。作事之力。但恥其不出已。而不必爲已作。無私之至也。謀閉不興。無姦宄也。外戶戶由外闔也。天下爲家。傳子也。貨力爲已。貨爲已收。力爲已作也。大人世及。天子諸侯大夫皆父子世傳。兄弟序及也。以賢勇知。以勇知者爲賢也。世道衰亂。真人乃見。禹湯文武所以由此而成其爲俊選也。聖由亂

而興禮由亂而謹著義以下皆言謹禮之事著明也
以禮制事明其義也以禮防欺考其信也以禮詰姦
著有過也以禮立愛刑仁也以禮訓恭講讓也刑範
也五者皆示民有常法也在執謂在高位去謂廢黜
也小康謂非大同也大同之世不規規于禮卽老子
云忠信之薄之意

按此節原禮所由起而其辭近詖謂聖由亂興禮因
亂謹禹湯文武成周由此選儻六君子生于平世不
得爲聖人乎禮在無事時可以不謹乎君臣父子可
以不正乎兄弟夫婦可以不睦乎在執者去謂爲小

康則大同之世。殃民者衆不去乎。大抵生人之初。禮制未興。隆古風醇。禮所由始。謂後世行禮不如古。則可。謂聖人制禮之後不如無禮之先。則不可。古未有禮。人類無異禽獸。非古獨治也。禮教興。風氣日新。人文日著。非今獨亂也。老莊之徒。以禮爲衰世之具。無禮爲上皇之風。豈其然乎。聖人立教。詩書執禮。斷自唐虞。洪荒以上存而弗論。蓋道自堯舜湯武而大行人倫明。禮樂興。風俗齊。非大同之世而何也。滅倫理。毀冠裳。如所謂野鹿標枝。無心思知覺。而後謂極治。此矯世憤俗之過。而不知其不可行也。世運由古而

今如江河東迤而日西靡聖人裁成輔相以節其過
文其不及而止必使江河西流日再中雖天地不能
且夫人倫日用古猶今也飲食男女古猶今也高下
散殊無之非禮苟有忠信之意卽是上皇之風故曰
親其親長其長而天下平厭尋常日用而遠希洪荒
爲大古是知二五而不知十也烏足與達禮之運哉
言復復問曰如此乎禮之急也孔子曰夫禮先王以承
天之道以治人之情故失之者死得之者生詩曰相去聲
鼠有體人而無禮人而無禮胡不遄傳死是故夫禮必
本於天敬於地列於鬼神達於喪祭射御冠昏朝聘故

不言文解
聖人以禮示之故天下國家可得而正也

如此急者承上文君子謹禮而言天者自然之名禮本於天道自然而聖人惟節文之以承天人情無禮則放佚怠惰近于禽獸故循禮者生之徒悖禮者死之徒相視也遄速也本於天者理也淆於地者文也列於鬼神者精誠也天道自然故曰本地道散殊故曰淆鬼神百祀故曰列喪祭射御冠昏朝聘八者皆禮之儀則聖人所以治天下國家者也

言僵復問曰夫子之極言禮也可得而聞與孔子曰我欲觀夏道是故之杞而不足徵也吾得夏時焉我欲觀

殷道是故之宋而不足徵也。吾得坤乾焉。坤乾之義。夏
時之等。吾以是觀之。夫禮之初。始諸飲食。其燔黍捭
豚。汙蛙尊而抔飲羹塊桴而土鼓。猶若可以致其敬
於鬼神。及其死也。升屋而號。告曰。皋某復。然後飯腥
而苴孰。故天望而地藏也。體魄則降。知氣在上。故死者
北首。生者南鄉。皆從其初。昔者先王未有宮室。冬則居
營窟。夏則居橧巢。未有火化。食草木之實。鳥獸之肉。飲
其血。茹其毛。未有麻絲。衣其羽皮。後聖有作。然後脩火
之利。范金合土。以爲臺榭宮室牖戶。以炮以燔。以亨烹
以炙。以爲醴酪。治其麻絲。以爲布帛。以養生送死。以事

鬼神上帝皆從其用故玄酒在室醴醢在戶粢醢醢在
堂澄酒在下陳其犧牲備其鼎俎列其琴瑟管磬鐘鼓
脩其祝嘏假以降上神與其先祖以正君臣以篤父子
以睦兄弟以齊上下夫婦有所是謂承天之祜作其祝
號玄酒以祭薦其血毛腥其俎孰其殽與其越活席疏
布以幕覓衣其澣帛醴醢以獻薦其燔炙君與夫人交
獻以嘉魂魄是謂合莫然後退而合享體其犬豕牛羊
實其簠簋蓬豆鉶羹祝以孝告嘏以慈告是謂大祥此
禮之大成也

極言禮者承上言天地鬼神爲極也夏時坤乾皆書

名坤乾夏易首坤次乾也。夏時或謂卽夏小正月令之類。等謂支干次第自燔黍捭豚以下皆極陳禮之始終。人生之初惟有飲食禮。自此起燔黍謂搏黍燒之無釜甑也。捭擘通手裂也。汙尊掘地爲坎盛水也。杯飲兩手掬水飲也。蕢通土曰塊草曰蕢。桴鼓椎土鼓泥爲鼓。此古禮之始。聖人因制爲養生之禮也。古者人死升屋號曰某反。臯號聲。某死者名。必升屋魂氣在上也。招魂不復乃行死事。含以生米薦以生肉包其熟肉以送葬。故魂望天魄藏地體魄下降。知氣上升也。知氣猶言靈氣。氣虛含靈死者葬則首北。

生者居則面南。生明死幽。皆從古初。非強設也。此制
爲送葬之禮也。營窟。周累其土爲穴也。棺。巢。高巢也。
茹毛。連毛而食也。范。範同。鑄器之式。土曰型。金曰鎔。
木曰模。竹曰範。范金。爲型範鑄金器也。合土。合水土
爲陶器也。裹而燒之曰炮。加于火上曰燔。水煮曰烹。
近火曰炙。醴酒屬酪。醬屬治。凍染也。以上諸事皆火
化之利。朔初也。從茹毛飲血之初而起也。玄酒四事。
皆事鬼神上帝。從初之禮。玄水色。古無酒飲水。後世
崇古。謂水爲玄酒。鬼神貴幽。祭以室爲尊。戶向明。次
之。堂在外。次之。堂下遠。又次之。酒貴淡。玄酒爲上。故

設于室醴酒一宿成次之設于戶醴蓋通爵屬黍齊
通周禮五齊皆酒也醴齊色紅又次之故設于堂澄
酒清久而後成味厚又次之故設于堂下蓋尊古卑
今貴澹泊賤醲厚也鼎烹肉俎載肉熟于鼎升于俎
也琴瑟在堂上管磬鐘鼓在堂下主人告神曰祝神
告主人曰嘏上神神氣在上謂天神也先祖人鬼也
君主臣助正君臣也以穆承昭篤父子也子姓皆在
睦兄弟也獻餼以序齊上下也君在阼夫人在房夫
婦有所也惟禮可格天故曰承天之祜作其祝號以
下敘祭祀始終之節以明禮之全所謂大成也周禮

祝號有六作其祝號造爲鬼神及品物之美號如皇尸旨酒之類卽祝辭也玄酒血毛腥俎皆太古之禮始祭之事孰殺以下至合莫中古之禮祭時之事合烹以下後世之禮祭終之事殺骨體也孰以湯燂之未全熟也越草名疏布麤布冪以覆尊越席疏布貴其質也滌帛漂染之帛嘉魂魄使神靈歆悅也合莫猶言潛通血毛腥俎孰殺越席疏布猶古初之意貴以眞誠冥合故曰合莫然後乃取其薦燂烹熟以食尸俎唯右體今取左體及餘未載者同烹故曰合也體其犬豕牛羊謂隨所用之牲別其貴賤之體以供

尸賓客兄弟衆俎及祭畢燕飲也。簠內圓外方以盛稻粱。簋外圓內方以盛黍稷。竹曰籩。木曰豆。其形同。籩盛果脯。豆盛菹醢。鉶如鼎而小以盛和羹。祝以孝子之意告神。嘏以祖考之意告主人。故曰孝慈大祥。積慶也。大成禮備也。夫三才五教莫非禮。獨言祭祀者。幽明之故。生死之說。鬼神之情狀。莫備于祭也。按古天子之祭。不可詳考。据疏義舉其槩。大禘之旦。王袞冕入。尸袞冕後入。王不迎尸。尸入室。樂作降神。王乃灌。時衆尸皆在大廟。依次灌用鬱鬯。尸皆祭。啐之奠之。是爲一獻。王乃出迎牲。后從灌。是爲二獻。牲

入至庭王親殺蒼毛血告于室于是行朝昭踐之事
延尸出室坐于堂太祖之尸坐尸西南面其主在右
昭東穆西相對主各在其右后薦豆籩乃薦腥于尸
坐前謂之朝踐卽此篇內所謂薦其血毛腥其俎是
也王乃酌獻尸是爲三獻后酌是爲四獻此禮器所
云設饌于堂也乃延尸入室太祖東面昭南面穆北
面徙堂上之饌于室內拜妥尸遂薦熟王酌獻尸是
爲五獻后酌獻尸是爲六獻于是尸食十五飯訖王
酌醑尸是爲七獻后乃薦加籩豆尸酢主人主人受
嘏獻諸侯后酌醑尸是爲八獻王酌獻卿大夫諸侯

酌獻尸是爲九獻九獻之後謂之加爵以尊卑爲次
据諸禮文杜撰其畧如此

孔子曰嗚呼哀哉我觀周道幽厲傷之吾舍魯何適矣
魯之郊禘非禮也周公其衰矣杞之郊也禹也宋之郊
也契也是天子之事守也

此以下皆言所以嘆魯之意文武之道至幽厲大壞
無足觀者魯爲周公之國故屬望于魯自信公作頌
興廟樂僭用天子郊禘魯禮又壞周公之教衰矣杞
宋亦諸侯用郊以其爲天子後守先代故事魯本諸
侯安得效之

按此節文義甚明。魯用郊，非周公之舊。鄭氏引春秋書郊牛口傷之類，以爲子孫不能奉行周公之道，豈惟不知禮，亦不知春秋。魯頌云：周公之孫，莊公之子，龍旂承祀，六轡耳耳。春秋匪解，饗祀不忒。皇皇后帝，皇祖后稷，非僖公之事，與？故春秋書郊牛，自僖公始。使魯郊，由伯禽，則僖以前豈無一牛災，而獨于僖以後數數爾邪？惟魯郊非周公之舊，夫子所以嘆也。至于杞宋之郊，亦季世之僭。夏商亡，其子若孫雖時王客之，而大禮不可假借。惟魯郊，故杞宋亦郊。魯以杞宋爲可，故亦自以爲可。承訛襲敝，非一朝一夕王迹熄。

而詩亡春秋所以作也

故天子祭天地諸侯祭社稷祝嘏莫敢易其常古是謂
大假祝嘏辭說藏於宗祝巫史非禮也是謂幽國醜學
假及尸君非禮也是謂僭君冕弁兵革藏於私家非禮
也是謂脅君大夫具官祭器不假聲樂皆具非禮也是
謂亂國故仕於公曰臣仕於家曰僕三年之喪與新有
昏者期基不使以衰裳入朝與家僕雜居齊齒非禮也
是謂君與臣同國故天子有田以處其子孫諸侯有國
以處其子孫大夫有采以處其子孫是謂制度故天子
適諸侯必舍其祖廟而不以禮籍入是謂天子壞法亂

紀諸侯非問疾弔喪而入諸臣之家是謂君臣爲讎是
故禮者君之大柄也所以別嫌明微慎損鬼神考制度
別仁義所以治政安君也故政不正則君位危君位危
則大臣倍小臣竊刑肅而俗敝則法無常法無常而禮
無列禮無列則士不事也刑肅而俗敝則民弗歸也是
謂疵慈國

承上言魯郊禘非禮惟天子祭天地諸侯祭境內社
稷祝嘏守常不改易古謂之大假大假猶言大祭人
與神交曰假假者虛無之意易曰王假有廟天子諸
侯天地社稷之祭謂之大或曰假福也周禮大祝掌

六祝六祈六辭六號九祭九拜之辭與法皆繫諸六
典之籍藏于太史屬大宗伯重其禮也後世惟宗祝
巫史習之典刑不著是謂幽昏之國醴斚皆爵名祭
饗之器夏曰醴殷曰皐惟二王後得用之諸侯遵時
制耳及猶獻也以醴皐祭是及尸也以饗是及君也
僭君僭天子也冕弁天子諸侯朝祭之冠兵革國之
武備私家大夫之家大夫蓄之是逼脅其君也大夫
雖有臣有祭器聲樂不得備備則尊卑無等故謂亂
國大夫以下有昏喪皆歸其家新昏期年不奉使而
親喪尤重以衰裳入朝是視公朝如私家與其家臣

雜居齊列無貴賤之等是謂君臣同國以上五失皆起于無制度上行則下效故古者天子有千里之田以處其子孫諸侯有大小之國以處其子孫大夫有采事之祿以處其子孫其班也以恩其裁也以義不得僭濫是謂制度五失之弊自上始故天子適諸侯必館于諸侯之宗廟以其爲鬼神嚴敬之地禮之典也籍猶典也如天子不依禮籍入諸侯之國是壞法亂紀自天子始何以帥諸侯諸侯非問疾弔喪入大夫之家是君與臣戲謔何以帥大夫相接以賓曰饋仁愛而義斷曰別刑肅謂峻刻也俗敝謂無廉節也

列謂上下之等。士不事。謂官不脩職。疵病也。

故政者。君之所以藏身也。是故夫政必本於天。穀以降命。命降于社。之謂穀地。降于祖廟。之謂仁義。降於山川。之謂興作。降於五祀。之謂制度。此聖人所以藏身之固也。故聖人參於天地。並於鬼神。以治政也。處其所存。禮之序也。玩其所樂。民之治也。故天生時而地生財。人其父。生而師教之。四者。君以正用之。故君者立於無過之地也。故君者所明也。非明人者也。君者所養也。非養人者也。君者所事也。非事人者也。故君明人則有過。養人則不足。事人則失位。故百姓則君以自治也。養君以自

安也。事君以自願也。故禮達而分定。故人皆愛其死而
患其生。故用人之知去其詐。用人之勇去其怒。用人之
仁去其貪。故國有惠。君死社稷。謂之義。大夫死宗廟。謂
之變。故聖人耐能以天下爲一家。以中國爲一人者。非
意之也。必知其情。辟於其義。明於其利。達於其患。然後
能爲之。

此節極言聖人以禮爲政。因應自然。無爲而治。政興
民宜。天下見政而不見君。是君身所藏也。政必本于
天。謂君不以私意爲政。般分布也。命令也。分布政令。
奉天理自然以降于下。后土祖廟山川五祀。因祭明。

禮皆政令之所寓也。命降于社。如報賽出師分封刑戮之類。殺于地之事也。凡有事于祖廟仁義之事也。凡有事于山川材木所出興作之事也。有事于五祀五氣時敘五材利用制度之事也。因禮寓政使天下見土地仁義興作制度之爲禮而不見君命之爲煩。是聖人所以藏身之固。參于天地並于鬼神以治民行政民不得而窺之者也。安天理之本然而行不過則是處其所存也。順人情之自然而政必宜民是玩其所樂也。天時地利父生師教四者皆所存所樂之事。君能序而治之用之以正則因應無爲所以藏身。

固而立于無過之地者也。故君者天下是非之所取以爲明，非用其明以察人，是非者也。天下民之所共養，非分其財以養民者也。天下臣民所奉事，非勞其身以事人者也。人人而明之，則知窮；人人而養之，則財匱；以上事下，則倒置；故百姓者，法君以自治。養君以自安，事君以自顯，禮教通達而天下各安其分，各求自盡。有事則樂于效死，而患于苟生；皆聖人處存玩樂以禮治民之效也。是以藏身無過之主，用人之智而能去其智之詐，用人之勇而能去其勇之怒，用人之仁而能去其仁之貪。凡知多詐，勇多忿，愛多貪。

去猶舍也。非人盡無詐與怒與貪也。用不求備。所以處存玩樂。藏身無過。禮達分定。而民愛其死。患其生也。故國有患。君以義死。其社稷大夫以辨死。其宗廟變辨通。所謂禮達分定也。耐古能字。聖人能以天下爲一家。中國爲一人。非私意也。由于知民之情。曉譬其義。明于其利。達于其患。然後能之。四者皆天理。民彝。處存玩樂之道。所謂藏身無過。因民之自然者也。○按此節原于易。聖人神道退藏之旨。卽存神過化之意。然有意而爲。反溺于黃老陰符牢籠之術。毫釐千里。不可不察。議論不必醇粹。而有精意。所謂禮之

卷之八
運也。舊解未達。

何謂人情。喜怒哀懼愛惡欲七者。弗學而能。何謂人義。父慈子孝。兄良弟弔。夫義婦聽。長惠幼順。君仁臣忠。十者。謂之人義。講信脩睦。謂之人利。爭奪相殺。謂之人患。故聖人之所以治人。七情脩十義。講信脩睦。尚辭讓。去爭奪。舍禮何以治之。飲食男女。人之大欲存焉。死亡貧苦。人之大惡存焉。故欲惡者。心之大端也。人藏其心。不可測度也。美惡皆在其心。不見其色也。欲一以窮之。舍禮何以哉。

承上言事物之變。不過情理利害四者。四者總之好

惡兩端聖人所以調攝之惟禮禮立人之美惡不能
逃視聽言動準諸禮其美可知毀閑踰檢其惡可知
故質諸禮而人之賢不肖可覩人而不仁如禮何雖
有深情厚貌要諸規矩準繩則詭遇之情窮故禮者
極人情之至人情所不能欺也

故人者其天地之德陰陽之交鬼神會五行之秀氣
也故天秉陽垂日星地秉陰竅於山川播五行於四時
和而后月生也是以三五而盈三五而闕五行之動莫
相竭也五行四時十二月還旋相爲本也五聲六律十
二管還相爲宮也五味六和十二食還相爲質也五色

六章十二衣還相爲質也。故人者，天地之心也。五行之端也。食味別聲被色而生者也。故聖人作則必以天地爲本，以陰陽爲端，以四時爲柄，以日星爲紀，月以爲量，鬼神以爲徒，五行以爲質，禮義以爲器，人情以爲田。四靈以爲畜，以天地爲本，故物可舉也。以陰陽爲端，故情可睹也。以四時爲柄，故事可勸也。以日星爲紀，故事可列也。月以爲量，故功有藝也。鬼神以爲徒，故事可守也。五行以爲質，故事可復也。禮義以爲器，故事行有考也。人情以爲田，故人以爲奧也。四靈以爲畜，故飲食有由也。何謂四靈？麟鳳龜龍謂之四靈。故龍以爲畜，故魚鮪

偉不浚審鳳以爲畜故鳥不獮獨麟以爲畜故獸不狘
越龜以爲畜故人情不失故先王秉蓍龜列祭祀瘞繒
室祝嘏辭說設制度故國有禮官有御事有職禮有序
此節極言禮之運妙于人心而盡制于聖人蓋人爲
天地陰陽鬼神五氣之萃此禮運之本也天秉陽以
下皆歷言天地陰陽五行往來無窮而聖人法以經
世宰物皆所謂禮之運也天高地下萬物散殊無之
非禮天地之德仁義是也陰陽之交動靜是也鬼神
之會生死是也五行之秀五官是也天統元氣陽爲
氣主日爲陽精星爲日之餘地承天陰承陽故氣通

于山川。天地陰陽交而播五氣于四時。氣候調和。成十二月。蓋月以日爲主。陽倡陰隨。日行不失度。而後十二月之會以時成也。三五十五也。月十五日前盈。十五日後缺。陰遯陽近則漸縮。遠則漸盈。五行之動。謂五氣之運迭相竭。謂終復始也。還相爲本。如木盡火生。木爲火本之類。五聲六律十二管。說見月令。宮聲于五音爲君。其管爲黃鐘。起子。值十一月。損益以生衆音。然各月有所值之律。各自爲君。相生如正月律中大簇。亦自生十二律。又如八音獨奏一音。各自有五音。樂記云。倡和清濁。迭相爲經也。五味酸苦甘。

辛鹹也。六和。春酸夏苦秋辛冬鹹。四時各有滑有甘以和之也。十二食。謂一歲十二月之食。質主也。如春三月食酸爲主。餘味相間之類。五色。青赤黃白黑。如春三月木青爲主。餘色相間之類。天地無心而人有靈覺。是卽天地之心。五氣散于萬物。其端發于最秀者。惟人。人生而食五味。別五聲。被五色。故聖人因人道制禮會。合天地陰陽四時五行。日月鬼神而成器。于禮義滋培于人情。極成功于萬物也。人情爲田。言國民也。四靈爲畜。言愛物也。本天地則無遺物。始陰陽則見性情。柄四時則事無失時。紀以日星則歲事。

詳列量以月則事功有程藝猶程也以鬼神爲徒故人敬服而可守以五行爲主故事循環而可復以禮義爲器故行無不成考成也以人情爲田故資取無窮而人利賴之以爲奧與藏也猶內則鵠與以藏食得名也以四靈爲畜故愛養蕃息飲食有所出鱗毛蟲之長鳳羽蟲之長龜介蟲之長龍鱗蟲之長人主能中和發育則麟鳳龜龍可致畜而其屬自蕃收養曰畜四靈以爲畜甚言鳥獸繁殖也鮪魚名淦作閔魚出沒貌猶猶然飛起貌狺狺然驚走貌能以龍爲畜則水族安而魚不淦藏能以鳳爲畜則羽族安而

鳥不驚猶能以麟爲畜則走類安而獸不奔我能以
龜爲畜則神龜出而人情無失策聖人禮教功化至
于如此故先王治功成而禮樂興幽明理人神格秉
著龜以卜日列祭祀以享鬼神瘞其繒帛宣其祝嘏
辭說所以格鬼神也設爲經制法度使國有禮官有
治事有專職禮有定序所以理民物也

故先王憲禮之不達於下也故祭帝於郊所以定天位
也祀社於國所以列地利也祖廟所以本仁也山川所
以儼鬼神也五祀所以本事也故宗祝在廟三公在朝
三老在學王前巫而後史卜筮瞽侑皆在左右王中

句

心無爲也。以守至正。故禮行於郊。而百神受職焉。禮行於社。而百貨可極焉。禮行於祖廟。而孝慈服焉。禮行於五祀。而正法則焉。故自郊社祖廟山川五祀。義之脩而禮之藏也。是故夫禮必本於大。一分而爲天地。轉而爲陰陽。變而爲四時。列而爲鬼神。其降曰命。其官於天也。夫禮必本於天。動而之地。列而之事。變而從時。協於分。藝其居人也。曰養其行。之以貨力。辭讓飲食冠昏喪祭。射御朝聘。故禮義也者。人之大端也。所以講信脩睦。而固人肌膚之會。筋骸之束也。所以養生送死。事鬼神之。大端也。所以達天道。順人情之大寶也。故唯聖人爲知。

禮之不可以已也。故壤國喪家亡人。必先去其禮。故禮之於人也。猶酒之有蘖也。君子以厚。小人以薄。

上節廣禮之用。此節言聖人運禮之權。蓋禮不止祭祀而惟以神道設教。則易達。天帝最尊。唯天子郊天。所以定天位。明有尊也。祀后土于國。所以表列成物之利也。祖廟所親。故曰仁。山川外神。故曰賓。五祀本五行。當時用事。故曰事。而皆以君心至正為主。王者隨事隨處。在廟在朝。在學前後左右。熏養周密。則邪慢之心。無自而生。宗宗人祝大祝掌祭祀三公論道。三老年高有德者。巫事鬼神主弔臨史書言動掌典。

籍卜筮占吉凶。瞽樂工誦詩侑勸也。輔弼疑丞勸王爲善者也。王中。王居中也。視聽言動無及于非禮。則心志齋明。與鬼神合德。以此行禮。禮無不達。上帝者。百神之宗。上帝享則百神皆受職。地不愛寶。故百貨可極。祝以孝告。嘏以慈告。故孝慈服行。五氣按序。故法則可正。此皆義之脩飾其節文而禮之含藏其妙運也。其文可見其義難知。故曰藏太一。猶太極函萬爲一之本體也。分爲天地則有上下高卑之別。轉爲陰陽則有刑賞生殺之用。變爲四時則有歲月久近之期。列爲鬼神則有郊廟祭祀之禮。聖人制典以降

令于下則謂之命。猶天之有命也。非人所主。皆官于天官。猶主也。天卽太一。太一無爲。本于天也。如秩序。倫常之類。殺于有象動而之地也。如貴賤陳位之類。列而爲五事。如宮室器用之類。變而爲四時。如春禘。秋嘗之類。合于分藝。如文質等級。隆殺之類。分藝。猶言分數。協分藝。謂裁制得中也。居人猶言安人。養者。愛利之意。有禮則安。無禮則危。故禮所以安人而養之也。或云。養當作義。貨財者。禮之資。筋力者。禮之具。辭讓者。禮之寶。冠昏八者。禮之目。大端猶言大本。人。身無禮。則放佚怠惰。肢體無所措。故禮所以會合肌。

膚而約束筋骸也。國家將喪禮，必先亡。故人于禮猶
酒之于麴蘖，有蘖則成，無蘖則敗。厚，醇酒也；薄，淡酒
也。醇則久，薄則敗。君子崇禮，小人去禮，所以成敗異
矣。

故聖王脩義之柄，禮之序，以治人情。故人情者，聖王之
田也；脩禮以耕之，陳義以種之，講學以耨之，本仁以聚
之，播樂以安之，故禮也者，義之實也，協諸義而協，則禮
雖先王未之有，可以義起也。義者，藝之分，仁之節也。協
於藝，講於仁，得之者強，仁者，義之本也，順之體也，得之
者尊。故治國不以禮，猶無耜而耕也；爲禮不本於義，猶

耕而弗種也。爲義而不講之以學，猶種而弗耨也。講之以學，而不合之以仁，猶耨而弗穫也。合之以仁，而不安之以樂，猶穫而弗食也。安之以樂，而不達於順，猶食而弗肥也。四體既正，膚革充盈，人之肥也。父子篤，兄弟睦，夫婦和，家之肥也。大臣法，小臣廉，官職相序，君臣相正，國之肥也。天子以德爲車，以樂爲御，諸侯以禮相與，大夫以法相序，士以信相考，百姓以睦相守，天下之肥也。是謂大順。大順者，所以養生送死，事鬼神之常也。故事大積焉而不苑，尹並行而不繆，細行而不失，深而通，茂而有間，連而不相及也。動而不相害也。此順之至也。故

明於順然後能守危也故禮之不同也不豐也不殺也
所以持情而合危也故聖王所以順山者不使居川不
使渚者居中原而弗敵也用水火金木飲食必時合男
女頒爵位必當年德用民必順故無水旱昆蟲之災民
無凶饑妖孽之疾故天不愛其道地不愛其寶人不愛
其情故天降膏露地出醴泉山出器車河出馬圖鳳皇
麒麟皆在郊數龜龍在宮沼其餘鳥獸之卵胎皆可
俯而聞規也則是無故先王能脩禮以達義體信以達
順故句此順之實也

子云君子義以為質禮以行之故言禮必言義義者

禮之本。本之以義。行之以禮。則于人情無不當。人情之外。無禮義。聖王經綸天下。不離人情耳。故曰。田田必耕。而後治。故禮譬則耕也。不合義。不可以播。義者禮所由起。譬則種也。不講學。則荒學。譬則耨也。耨耘草也。心不真懇。則行禮支離。知及仁不守。雖得必失。故體仁爲本。所以聚之也。不從容和順。則強世不安。故播樂所以安之也。禮一定不易。義隨時變通。故禮爲義之寶也。藝猶術也。凡處事之術。以義爲分量。仁無限。而義有節。故義所以合事。講仁者也。能權能斷。故得之者強也。義以仁爲本。能愛能公。故爲順之全。

體體元長人故得之者尊既言播樂以安之則禮之極功矣而又益之以不達於順猶食而弗肥者蓋播樂以安禮之成已而達順以後則推之天下國家者也天子德爲車以載物也樂御德以和行也王道四達故曰爲車爲御諸侯謹侯度故曰以禮相與大夫則率法士則相考以信百姓則相守以和睦而已事大不苑以下皆大順之象凡物大者叢積則苑結而不通苑猶苑也兩物并行或相紕繆行細渺或有差失入深窅或不通達茂密則無空間接連則相牽絆動搖則相戕害數者不然則和順之至矣明於順則

自不至于違逆而能持守其危故大順之禮不尚同
不尚豐亦不尚儉一于豐儉所謂同也同異豐儉各
待其宜所以維持人情而聯合傾危聖王所爲順也
如宜于山者不使居水宜于渚者不使居平原故人
不因敝也五材之用飲食之節各以其時合男女必
稱其年頒爵位必稱其德用民必順其時皆體順之
道所以爲禮也故和氣感召災疾不作草木之怪曰
妖禽獸之怪曰孽四時和五氣順天不愛其道也百
物遂五穀登地不愛其實也孝弟行禮讓與人不愛
其情也愛猶吝也膏露露凝如膏醴泉泉甘如醴器

禮記通解 卷八
車。自然之器如車。輟數同。則是無故。猶言此無他也。脩禮達義。所謂義以爲質。禮以行之也。體信達順。所謂遜以出之。信以成之也。

按後世言禮者。其失有二。以禮爲不必拘。是老莊之荒蕩也。以禮爲拘拘。是章句之陋習也。義以爲質。禮以行之。則聖人中正之道矣。故曰和爲貴。知和而和。不以禮節之。亦不可行。行者運也。禮運禮器所言多和行之意。聖人位育天地萬物。致中和而已。中和所以運也。故治極于順。禮由于和。中庸所以爲德之至。故禮與中庸。非可離而二也。

禮器第十

禮器者。禮之器。道器一也。器以載道。易曰。形而下者。謂之器。形而上者。謂之道。又曰。形乃謂之器。道器有上下。而皆不離形。故天地萬物。莫非器也。而禮存乎其中。故曰。範圍天地之化。而不過。曲成萬物而不遺者。禮器之謂。君子讀禮。運而知禮之爲用。圓神不滯。讀禮器。而知禮之爲體。變通無方。非世儒牽強支離。繁文拘節之爲器耳。非真有得于先聖之微旨者。烏能達此。作記者。於是乎爲有功矣。

禮器是故大備。大備盛德也。禮釋回增美質。措則正。施

則行。其在人也。如竹箭之有筠也。如松柏之有心也。二者居天下之大端矣。故貫四時而不改柯易葉。故君子有禮。則外諸而內無怨。故物無不懷仁。鬼神饗德。先王之立禮也。有本有文。忠信。禮之本也。義理。禮之文也。無本不立。無文不行。

此節言君子學禮之器。學禮成器。是故充實光輝而盛德大備也。蓋禮可以消釋人之回邪。增益人之美質。非禮不動。則回釋矣。潤身生色。則美增矣。故以措之事。則無不正。施之天下。則無不行。此盛德大備。所以爲禮之器也。箭。小竹也。筠。竹節也。竹節均。故曰筠。

鄭謂竹之青皮鑿也。心木中心筠在外。心在內。內有貞心。外有直節。道德事物莫不皆然。故曰二者天下之大端。物備此則爲竹。箭松柏人備此則爲君子。有禮則敬人而外諧和。好禮則樂善而內無怨。故仁可以懷民物而德可以饗鬼神也。本謂內文謂外制。事爲義順物爲理。故曰文也。本立文行。卽二者大端之意。所謂禮之器也。

按鄭康成諸人之言禮文而已矣。密于筠而疎于心。故以儀禮周禮爲禮。宋諸儒之言道本而已矣。深于心而離其節。故以中庸大學爲道。記言合內外會道。

器故曰大備盛德如竹箭有筠松柏有心外諧而內無怨本立而用行此博約上下一貫之旨是故聖教莫大于禮顏子問仁教以克己復禮請事四勿故能三月不違大備盛德之謂也故曰禮云禮云玉帛云乎必若守儀禮周禮爲經離中庸大學爲德則裂矣禮運禮器二篇之義學者不可不熟思也

禮也者合於天時設於地財順於鬼神合於人心理萬物者也是故天時有生也地理有宜也人官有能也物曲有利也故天不生地不養君子不以爲禮鬼神弗饗也居山以魚鼈爲禮居澤以鹿豕爲禮君子謂之不知

禮故必舉其定國之數以爲禮之大經禮之大倫以地
廣狹禮之薄厚與年之上下是故年雖大殺衆不匡懼
則上之制禮也節矣禮時爲大順次之體次之宜次之
稱次之堯授舜舜授禹湯放桀武王伐紂時也詩云匪
革其猶聿追來孝天地之祭宗廟之事父子之道君
臣之義倫也社稷山川之事鬼神之祭體也喪祭之用
賓客之交義也羔豚而祭百官皆足大牢而祭不必有
餘此之謂稱也諸侯以龜爲寶以圭爲瑞家不寶龜不
藏圭不臺門言有稱也

此節明禮器之大無所不宜聖人制禮非強世也天

高地下。人物散殊。無往非禮。苟強其所不合。而失其所固有。非忠信之本。理義之文。而措之不正。施之不行。欲外諧而內無怨難矣。合于天時者。因革之中也。設于地財者。豐儉之節也。順于鬼神者。屈伸之變也。合于人心者。性情之本也。理萬物者。順治之效也。隨天時所生。地理所宜。人工所能。物曲所利。無時無處。無人無物。不可行禮。亦無一之可以離禮也。曲委曲致用也。舍日用而求高遠。厭易簡而耽新奇。不可爲禮。故天所不生。地所不養。人情物理所難。君子不以爲禮。鬼神亦不饗。惡失常也。如求魚鼈于山。逐鹿豕

于水。豈時中之禮乎。定國猶建國。數如千里百里六
七十里之數。大經如天子公侯伯子男之等。大倫謂
用禮之節。各因地之廣狹也。厚薄謂行禮之費。各量
歲之豐儉也。品式既定。制用有節。是以雖年飢而人
心不至。倉皇恐懼。匡恆通恐也。此皆時中之禮。時者。
一代之因革。爲大順者。因之而已。爲次體者。禮之式
也。爲次宜者。禮之辨。又次稱者。禮之分。又次堯舜之
禪授。湯武之放伐。皆時也。革。亟通猶謀也。聿。惟也。詩
言文王遷豐。非亟于成己之謀。惟追述先業。來致其
孝。時之謂也。天子父天母地。奉祀宗廟。明父子之道。

正君臣之義。人之大倫。所謂順也。社稷山川鬼神。之
祀。隆殺之式。所謂體也。喪祭有費用。賓客有交際。隨
宜裁制。所謂宜也。凡禮輕重不偏。降殺有等。必使適
均。如羔豚而祭。不以物小。而使百官不足。雖大牢而
祭。不以用饒。而使物有餘。所謂稱也。小羊曰羔。小豕
曰豚。又如諸侯有國。則藏龜以決大事。天子錫之封
圭。則寶以爲瑞。有象魏。則臺門以爲觀闕。大夫不然。
皆所謂稱也。

禮有以多爲貴者。天子七廟。諸侯五。大夫三。士一。天子
之豆二十有六。諸公十有六。諸侯十有二。上大夫八。下

大夫六諸侯七介七牢大夫五介五牢天子之席五重
諸侯之席三重大夫再重天子崩七月而葬五重八翼
彭入諸侯五月而葬三重六翼大夫三月而葬再重四
翼此以多爲貴也有以少爲貴者天子無介祭天特牲
天子適諸侯諸侯膳以飢諸侯相朝灌用鬱鬯無邊豆
之薦大夫聘禮以脯醢天子一食諸侯再大夫士三食
力無數大路繁盤纓一就次路繁纓七就圭璋特琥璜
爵鬼神之祭單丹席諸侯視朝大夫特士旅之此以少
爲貴也有以大爲貴者宮室之量器皿之度棺槨之厚
丘封之大此以大爲貴也有以小爲貴者宗廟之祭貴

者獻以爵賤者獻以散去尊者舉解志卑者舉角五獻

之尊門外缶門內壺君尊瓦甒武此以小為貴也有以

高為貴者天子之堂九尺諸侯七尺大夫五尺士三尺

天子諸侯臺門此以高為貴也有以下為貴者至敬不

壇埽地而祭天子諸侯之尊廢禁大夫士櫜禁此以下

為貴也禮有以文為貴者天子龍袞諸侯黼大夫黻士

玄衣纁裳天子之冕朱綠藻十有二旒諸侯九上大夫

七下大夫五士三此以文為貴也有以素為貴者至敬

無文父黨無容大圭不琢大羹不和大路素而越席犧

尊疏布黼見禪原杓此以素為貴也孔子曰禮不可不

省也。禮不同不豐不殺。此之謂也。蓋言稱也。禮之以多爲貴者。以其外心者也。德發揚詡許萬物大。理物博如此。則得不以多爲貴乎。故君子樂其發也。禮之以少爲貴者。以其內心者也。德產之致也。精微。觀天下之物。無可以稱其德者。如此。則得不以少爲貴乎。是故君子慎其獨也。古之聖人。內之爲尊。外之爲樂。少之爲貴。多之爲美。是故先王之制禮也。不可多也。不可寡也。唯其稱也。是故君子大牢而祭。謂之禮。匹士大牢而祭。謂之擯。管仲饗朱紘宏山節藻梲拙君子以爲濫矣。晏平仲祀其先人。豚肩不揜豆。斝衣濯冠以朝。君子以爲隘矣。

是故君子之行禮也。不可不慎也。衆之紀也。紀散而衆亂。孔子曰。我戰則克。祭則受福。蓋得其道矣。

此承上文有稱之意。而歷言多少大小高下文質之異。所謂不同不豐不殺稱而已者也。天子誠深孝篤。立廟宜多。諸侯以下德漸薄。廟漸少。天子諸侯豆數。据大禮正羞而言。其庶羞或不止此介。賓之副也。諸侯爲正賓。其爲介者七人。主君饋以七牢。諸侯使卿大夫聘降二等。則介五人。主君饋以五牢。席以藉地。行禮用之。葬則以揜壙。及藉棺也。襲形如扇。置柳車兩傍。以蔽棺也。天子無介。謂至尊無主爲賓。故無介。

祭天特牲用一牛也。巡守適諸侯，諸侯膳之亦一牛。牛子曰：犢灌獻酒也。主君以鬱鬯之酒獻賓，無蓬豆。惟馨不惟物也。大夫聘鄰國，則主君禮之以脯醢。二物亦食品之小者。食謂公庭禮食。天子一食，至尊以德爲飽。一食而止，待侑而後更食也。食力者，庶人工商也。禮不下庶人，食無數。惟飽則止。大路，祭天之車，無文飾也。繁作鞶馬當胸皮帶，結毛爲纓，懸鞶上。一就結一匝也。次路，副車也。七就七匝也。少者貴，多者賤。而郊特牲又云：次路五就。次路非一也。合曰：圭判曰璋。皆玉爲之。諸侯朝王以圭，朝后以璋。將獻馬，先

圭將獻皮先璋皮馬之獻不升堂圭璋特達也琥以
玉爲虎形璜以玉爲半環二物賤于圭璋不可以特
達惟主人酬賓以幣送酒則用琥璜將之故曰爵鬼
神之祭謂祭外神不設重席與人異也諸侯朝與大
夫揖特每人一揖也旅衆也士雖衆君共與一揖而
已。是少者貴也。周官典命宮室以命數爲節。上公至
子男或九或五各有差。以大爲貴也。天子大路大常
大弓大圭之類。器皿以大爲貴也。車旗之類曰器。蓬
豆之器曰皿。尊者之棺至四重卑者止一重。棺槨以
大爲貴也。墳之大者曰丘。以土揜坎曰封。周官冢人

以爵爲丘封之等丘封亦以大爲貴也爵容一升散容五升獻爵者主人獻散者佐食故有貴賤之等解三升角四升舉觶者皇尸舉角者主人故有尊卑之別五獻子男之禮獻因命數子男五命故五獻缶大于壺壺大于觶三者皆尊名列尊之法缶在門外壺在門內君尊酌君酒之尊不言內外列于堂上也堂九尺離地九尺也封土曰壇郊祀不壇至尊無上也禁以承酒尊木爲之無足曰廢廢禁無足故下枌禁有足故高枌與也所以載猶鬱鬯之尊用舟皆取承載意龍袞畫龍于衣其狀袞然白黑曰黼黑青曰黻

玄赤黑色。纁赤色。冕冠之最貴者。鄭謂祭服之冠。其實大禮多用之。藻纁同。以五色絲爲纁。黃玉垂冕前。後謂之旒。天子冕十二旒。旒十二玉。諸侯大夫數以次殺。大圭天子所執。圭諸侯封圭亦謂大圭。詩云。錫爾介圭。介大也。不琢不雕刻也。大羹不和之羹。大路見前。越草名。犧尊尊形象牛。粗布爲幕以覆尊。白木爲杓以取酒。禮不可不省。謂多少高下。大小文質皆有精義。當省察也。所以貴多者。備物以將敬。用心在物。故曰外其心。蓋盛德之發舉。揚張詡乎萬物。萬物大得乎理而功施廣博。所以貴多。故君子精神宅遂。

樂其發也。所以貴少者，存誠感格，用心在志，故曰內其心，蓋德始生之極，至精至微，天下之物無可擬稱者，所以貴少。故君子收斂退藏，戒慎其獨也。古聖人內其心，藏于精微，以主一爲尊。外其心，揚誦萬物，以宣暢爲樂。少者希則貴，多者富則美，故禮多寡不偏，唯其稱耳。君子大牢而祭，謂大夫以上匹士猶匹夫匹隻也。猶治言亂也。一帛兩端成匹，故謂獨爲匹。攘竊奪也。簠以盛黍稷，鏤刻金，天子宗廟之器也。紃冕纓垂其餘爲飾也。朱，天子冠纓之色。玉藻云：玄冠朱組纓，天子之冠也。節，梁上短柱，承屋脊者，一名薄櫨。

一名栴削爲山形。椀梁間短柱俗謂侏儒藻畫文爲水草也。明堂位云山節藻梲。天子之廟節濫放溢也。豚豕之小者祭牲用肩載以俎。俎大豆小豚小故言豆。豚肩不辨豆甚小也。隘陋也。管仲奢而晏子陋皆不稱也。紀者網之維爲衆目者也。戰克祭受福以其慎也。

按祭法適士二祀庶士庶人一祀。今言士一廟或謂爲下士耳。然則庶人不當祀與。周禮掌客上公豆四十侯伯豆三十二。今言天子豆二十六。公侯以次降。鄭謂周禮兼東西兩夾之豆言也。或引天官醢人四

豆之實解數不合。王制諸侯未賜圭瓚則資鬯于天子。今言諸侯相朝皆用鬯則是諸侯各自有鬯也。周禮巾車玉路繁纓十有二就以祀餘路以次降。今言大路繁纓一就。次路繁纓七就。解者遂推爲殷禮。尚書周禮先王席皆如朝覲饗射之數。今言鬼神之祭單席是與朝覲饗射異也。考工記云堂崇三尺。今言天子之堂九尺。諸侯七尺。大夫五尺。而鄭以考工記爲夏商禮。豈周禮而記夏商與。天子龍袞。諸侯黼。大夫黻。士玄衣纁裳。與周禮司服五冕之說亦異。周禮冕止大夫而記云士三。則是士亦得用冕也。君子大

牢而祭惟匹士不得用則是大夫以上亦得用大牢而饗禮以少牢爲大夫禮凡禮家言多矛盾難盡合於禁高鄭以爲無足大圭不珉鄭作不纂儀尊作姿尊皆鑿說也

君子曰祭祀不祈不麾蚤不樂葆大不善嘉事牲不及肥大薦不美多品

此言祭祀之禮在盡其誠君子曰記者自言也祭雖受福君子不爲祈福而祭祭雖尚蚤然先事預備不以臨事麾帥爲早麾揮通督促也葆合也或作葆葆大謂天子諸侯合人心奉祭所謂民力普存而以明

得意是驕鬼神也。嘉吉善也。祭本吉。故品物皆有美名。謂之嘉事。然思念祖考。對越鬼神。皆當畏敬。不敢謂爲嘉事。美悅以從也。牲雖肥大。貴在純潔。不以肥大爲及也。及猶至也。薦雖多品。貴在明信。不以多品爲美也。此君子所以善其祭。舊解未達。

孔子曰。臧文仲安知禮。夏父弗綦忌逆祀而弗止也。燔煩柴於奧。夫奧奧者。老婦之祭也。盛於盆。尊於瓶。禮也者。猶體也。體不備。君子謂之不成。人設之不當。猶不備也。禮有大有小。有顯有微。大者不可損。小者不可益。顯者不可揜。微者不可大也。

臧文仲名辰魯大夫以知禮稱夏父弗綦人姓名魯禮官逆祀謂躋魯僖公主于閔公上事在春秋文公二年閔僖皆莊公子閔爲適而幼繼立遇僖以庶長繼閔魯人謂僖本兄升其主于閔上亂昭穆之序故曰逆祀臧文仲不能正之安在爲知禮祭祀將終祭爨報先炊也奠黍肉于竈墜不必于奧夏父弗綦謂爨爲火神燔柴于奧以祭之非禮也夫奧之奧當作爨老婦卽先炊黍肉盛于盆酒盛于瓶盆瓶皆炊器所謂設之當也大而顯者綱常名分之類小而微者節文器數之類如升僖于閔損其大也燔柴于奧

益其小也。饌簋朱紘大其微也。豆豚泔濯揜其顯也。皆所謂設之不當也。

於經禮三百曲禮三千其致一也。未有入室而不由戶者。君子之於禮也。有所竭情盡慎致其敬而誠者。有美而文而誠若。君子之於禮也。有直而行也。有曲而殺也。有經而等也。有順而討也。有撝變而播也。有推而進也。有放而文也。有放而不致也。有順而撫也。三代之禮一也。民共由之。或素或青。夏造殷因。周坐尸詔脩武方。其禮亦然。其道一也。夏立尸而卒祭。殷坐尸。周旅酬六尸。曾子曰。周禮其猶醯醢却與。

此節言先王制禮其義多端而其道本于一者誠也誠者愛敬之真心也經禮謂名分等級常行之大體曲禮謂升降進退委曲之小節經曲雖繁極而致之無非盡心之誠而已誠譬則室三千三百譬則戶入室必由戶不能舍也竭情盡慎致敬卽前貴少貴小之類內其心不以文爲美故誠自若美而文卽前貴多貴大之類外其心以美將敬故誠自若若者殊途同歸之意直而行謂愛親敬長率性自然如親始死哭踊無節之類曲而殺謂抑情合節委曲減殺如哭踊有數喪服有時之類經而等謂經常一定貴賤

同等如父母之喪無貴賤一之類順而討謂養生送死人有同心順人心以討其所欲如葬祭各得自盡之類斲芟取也播布散也斲而播謂芟取上之所有布散于下如班爵祿之類推而進謂常禮所損推情常禮之外如葬慈母猶已母喪師如喪父之類放而文謂極致文采如天子冕服車旗極盡文飾之類放而不致如公侯以降至于大夫不敢盡飾之類撫攔止也順而撫謂順等級當然各止于其所如天子公侯伯子男以文降絕之類素近白殷色青近黑夏色夏造殷因謂前作後承不同爲禮則一周坐尸謂周

人之祭尸卽位而坐詔謂祝告尸行禮侑謂佐食勸尸食武步也鄭作無方謂行禮進退之方尸不動而詔侑行禮皆祝與佐食輩行之周禮亦不同殷夏也道一卽所謂致一而誠若也夏立尸不坐也殷坐尸與周同也周旅酬六尸謂祫祭七廟之主合食于太廟太祖尸尊不動而毀廟之主無尸故惟六尸自相旅酬也世俗斂錢會飲曰醪記者引曾子之言證六尸旅酬之禮殷夏無之其道亦一也

君子曰禮之近人情者非其至者也郊血大饗腥三獻燔潛一獻孰是故君子之於禮也非作而致其情也此

有由始也。是故七介以相見也。不然則已慙。三辭三讓而
至。不然則已蹙。故魯人將有事於上帝。必先有事於
類。類宮。晉人將有事於河。必先有事於惡。呼池。齊人將
有事於泰山。必先有事於配林。三月繫七日戒。三日宿
愼之至也。故禮有擯詔。樂有相步。溫之至也。禮也者。反
本脩古。不忘其初者也。故凶事不詔朝。潮事以樂醴酒
之用。玄酒之尚。割刀之用。鸞刀之貴。莞簞之安。而橐
高上鞞夏之設。是故先王之制禮也。必有主也。故可述
而多學也。

此節明禮有初而行禮貴知本。恆情務枝葉而忘本。

根故曰非其至也郊祀天神尊故薦牲先血血方新去人食遠也大饗謂祫禘之類禮亦尊薦用腥腥去人食亦遠三獻謂山川社稷之祭禮稍輕燔謂燔肉以湯未熟漸近人食也一獻謂羣祀小禮薦熟食同人也人所可食者以獻羣小祀人所不可食者以薦大事蓋近人情則褻遠人情則希所謂禮近人情非其至也血腥燔三者凡祭皆備各舉其所重言以明大禮貴初至敬不文也作謂強造致其情謂徑情無節由始謂循其初從容有節不以近情爲至也七介諸侯相見之禮主賓交接無介以紹于其間太慤固

而不文三辭三讓辭讓以三爲節主延賓自大門入
每門讓賓賓辭如此者三乃至廟中苟不辭讓徑入
則迫蹙無節不慙不蹙乃所爲由始也魯人郊祀僖
公以後之事頻宮魯學宮名將郊必先有事於頻宮
如今之習儀也鄭謂爲告后稷頻宮豈稷廟邪惡池
鄭據職方作庠池河之從祀也配林林名泰山之從
祀也祭大先小卽不慙不蹙之意三月繫謂祭前三
月繫犧牲于牢詩云秋而載嘗夏而福衡周禮充人
祀五帝則繫于牢芻之三月是也七日戒祭統所謂
散齋七日以定之也三日宿所謂致齋三日以齊之

也。先事戒備。慎之至也。主賓相見。有擯相以詔其禮。饗工作樂。有賁賸以輔其步。紹介而後禮行。相導而後樂作。從容不迫。溫之至也。皆所謂不慙不蹙。非作而致其情。有由始者也。反本。謂存誠敬之心。脩古謂不失忠質之意。所謂不忘初也。凶喪之事。哀情真切。不待詔告。朝廷之事。吉禮從容。乃始用樂。醴酒可用。而必以水爲玄酒。列于上尊。尋常割肉之刀可用。而告殺必用古有鈴之刀。鸞鈴也。刀上有鈴。動中音律也。莞。細蒲也。簟。席也。橐鞬。去穀之禾稈。鞬。秸同。莞。簟。非不安。而必用橐鞬以爲藉。四者皆所謂反本脩古。

不忘初也。有主卽不忘初。有主則聞見不惑。故可以述古多學而求會通也。

君子曰：無節於內者，觀物弗之察矣。欲察物而不由禮，弗之得矣。故作事不以禮，弗之敬矣。出言不以禮，弗之信矣。故曰：禮也者，物之致也。是故昔先王之制禮也，因其財物而致其義焉爾。故作大事必順天時，爲朝朝夕必放輦於日月，爲高必因丘陵，爲下必因川澤。是故天時雨澤，君子達壘壘焉。是故昔先王尚有德，尊有道，任有能，舉賢而置之，聚衆而誓之。是故因天事，因地事，地因名山，升中于天，因吉土以饗帝于郊，升中于天而

鳳皇降龜龍假格饗帝於郊而風雨節寒暑時是故聖人南面而立而天下大治

禮者天道自然之節天地陳位萬物並列而禮行乎其中人也者中和之會三才之樞中和致則有節于內而仰觀俯察盡人盡物萬物之理無有能遁其情者如權度設而不可欺以輕重長短故動則民敬言則民信蓋我操其符而物神其應也常人之心昏迷放佚內志不定何以觀察手物而時措咸宜乎故禮者天則也物之極至也先王之制禮非強作也因其財用順其物宜而致其義焉大事如朝聘喪祭之類

順天時。如春祠秋嘗之類。天子春分之旦朝日于東門之外。秋分之夕祀月于西門之外。日自東出。日出爲朝。月由西生。月出爲夕。放猶順也。丘陵本高。川澤本下。故爲高下者。因之。天時雨澤。萬物發生。疊疊不息。皆造化因順之理。君子有節于內而觀物。則心與造化通矣。是以先王因人圖治。尚德尊道。舉賢而置之。不疑聚衆而誓之。不欺。所謂有節于內。因物致義而人敬信之者也。因天事。天祭于園丘也。因地事。地祭于方澤也。因名山。升中于天。朝會諸侯于地。中。柴望于嵩嶽。以升告于天。嵩洛者。天地之中。故曰

升中。吉土。卽洛邑。周禮卜陰陽之會。風雨之交。建中都。故曰吉土。朝會。則饗帝于郊。靈物至。時節序。此因順之至。盛德疊疊。而觀物由禮之極功。聖人所以無爲而天下大治者。禮至之效也。

按此節極言禮因自然。貫三才。卽所謂致中和。天地位。萬物育者也。鄭據緯書。附會後世封禪之說。以尚德任賢。誓衆爲重其事。以名山爲泰山。梁父。以升中爲稱頌太平。以鳳皇風雨爲符應。其事不見于詩書。其文義亦牽強開闢。技方神僊鬼怪之端。導秦隋巡行之轍。敵何可言。然周頌般之詩云。於皇時周。陟其

高山夫旣柴望告天登山事或有之而緣飾爲封泰
山禪梁父則無稽矣般本大武樂章所謂再成而南
國是疆作于周公營洛之後武王在日巡守或一行
日不暇給周公爲省巡守營東都東都建後詩書不
復載巡守事卽使升中陟高山唯東都中嶽無泰山
梁父也詩序言四嶽据古禮明詩義耳周公亦据古
禮作頌其實武王未及巡守周行天下也

天道至教聖人至德廟堂之上壘尊在阼犧尊在西廟
堂之下縣鼓在西應鼓在東君在阼夫人在房大明生
於東月生於西此陰陽之分夫婦之位也君西酌犧象

夫人東酌罍尊禮交動乎上樂交應乎下和之至也禮也者反其所自生樂也者樂其所自成是故先王之制禮也以節事脩樂以道志故觀其禮樂而治亂可知也
蘧伯玉曰君子之人達故觀其器而知其工之巧觀其發而知其人之知故曰君子慎其所以與人者

天道有至教陰陽是也聖人有至德中和是也罍尊刻尊爲雲雷之文尊在堂上云在阼者前當阼階也
犧尊尊形如牛西卽罍尊之西縣鼓大鼓懸設之應鼓小鼓提擊之以應和也當祭之時君位在阼夫人位在房阼東階房東房祭統云君純冕立于阼夫人

副禕立于東房阼在南房在北內外之分也君象日
夫人象月君獻則自阼進酌犧尊之酒犧尊在罍尊
西以西爲上也夫人亞獻則自房出酌罍尊之酒罍
在犧尊東也犧象尊形像犧或曰以象骨節之也東
西合而陰陽交禮動乎堂上也西鼓東應樂交應乎
堂下也禮備樂作上動下應和之至也皆本諸天道
聖德禮所自生樂所自成者中和道德也禮主節故
言反樂主生故言樂反之樂之則本立然後制禮以
節事脩樂以道志則用行矣節事之禮非玉帛凡動
作威儀皆是道志之樂非鐘鼓凡容貌辭氣皆是故

曰觀禮樂而其事與志可知君子之人達卽所謂有節于內而觀物者也慎其所以與人卽慎禮樂也觀禮樂而知治亂則禮樂所以與人觀者也可不慎與○按此節據東西交應之文鄭謂天子諸侯有左右房夫人在西房祭統云君純冕立于阼夫人副褱立于東房是房本在東也以廟制推之堂後爲室室西深入爲奧是堂之西北也故西不得復有房房在室東壁是堂之東北也堂室相連房戶之外爲北堂卽昏禮設婦洗之處南對阼階凡行禮主人主婦出堂入室皆在東故有西室無西房夾室則有東西今之

廂房耳。與堂不屬。又以義推之。東爲主位。主婦從主。君君在東階。夫人獨在西房。前當客位。于義未稱。日月之生有東西。月從日行。皆由東。鼓有東西。而爲衆音之始。故射禮東鼓南面。西鼓亦東面。雖交應而皆本其始。非對待之義。今謂夫人在西房。東酌罍尊。文似而于義理制度無所考。豈堂事則君與夫人分東。西室事則夫人亦在東。與難強質也。

大廟之內敬矣。君親牽牲。大夫贊幣而從。君親制祭。夫人薦盞。君親割牲。夫人薦酒。卿大夫從君。命婦從夫人。洞洞乎其敬也。屬屬乎其忠也。勿勿乎其欲饗之也。納

牲詔於庭血毛詔於室奠定詔於堂三詔皆不同位蓋
道求而未之得也設祭于堂爲祫廟乎外故曰於彼乎
於此乎一獻質三獻文五獻察七獻神

大廟祖廟也始祭尸入裸鬯後君出廟門外迎牲親
牽以入大夫奉幣從以贊禮將告納牲于神也制割
也制祭謂殺牲薦血之後延尸出堂君親割薦腥用
鬱鬯洗肝燔之曰制祭于時夫人酌盞齊以獻盞齊
者周禮五齊之第三也君親割牲謂堂事畢延尸入
室熟牲體以薦君親割肉于時夫人酌酒以獻先齊
後酒者齊質酒文也洞洞表裏如一也屬屬始終無

聞也。勿勿，茫昧貌。納牲，謂始祭迎牲庭下，以幣告神也。詔，告也。血毛，謂殺牲以血毛告于室。未，堂事之先。尸在室也。奠，定肉熟也。詔于堂，堂事將終，告尸入室饋熟也。於庭於室於堂不同位，求神所在而未得也。道言也。釋所以三詔之義。設祭于堂，謂延尸出堂薦腥薦爛，所謂朝踐之事也。廟門曰祊。祊之言方，神所在之方。詩云：「祝祭于祊。」使祝索神祭于廟門外也。於彼乎於此乎，蓋古語言神無定在也。初獻而質，禮方始也。三獻而文，情始展也。五獻而祭，思成如在也。七獻而神潛通冥漠也。言奇不言偶，舉主人之獻而該

主婦也。鄭以命數言。一獻爲小祀。則腥血之薦質也。豈小祀與承上文於彼於此而言大廟之內敬之至也。

大饗其王事與。三牲魚腊。四海九州之美味也。籩豆之薦。四時之和氣也。內納金示和也。束帛加璧尊德也。龜爲前列。先知也。金次之。見情也。丹漆絲纁竹箭與衆共財也。其餘無常貨。各以其國之所有。則致遠物也。其出也肆夏而送之。蓋重禮也。

大饗謂祫禘王事。言非諸侯以下所得行也。三牲謂大牢牛羊豕也。魚水族。凡禽肉之全乾者曰腊。美味。

謂水陸之供和氣謂五穀果實之品內金侯邦所納之金示和金聲和也諸侯贊見天子束帛加玉其上土比德故尊也庭實之旅龜居前列貴先知也金次之利和義人情也丹朱砂之屬續絮也箭小竹可爲矢者出謂諸侯助祭旅酬畢而賓出也肆夏當作陔夏周禮九夏尸入奏肆夏客醉出奏陔夏夏大也備物極隆所以爲王事也

祀帝於郊敬之至也宗廟之祭仁之至也喪禮忠之至也備服器仁之至也賓客之用幣義之至也故君子欲觀仁義之道禮其本也君子曰甘受和白受采忠信之

人。可以學禮。苟無忠信之人。則禮不虛道。是以得其人之爲貴也。孔子曰。誦詩三百。不足以一獻。一獻之禮。不足以大饗。大饗之禮。不足以大旅。大旅具矣。不足以饗帝。毋輕議禮。子路爲季氏宰。季氏祭。逮闇而祭。日不足繼之以燭。雖有強力之容。肅敬之心。皆倦怠矣。有司跛倚以臨祭。其爲不敬大矣。他日祭。子路與_平室事交乎_昭。堂事交乎階。質明而始行事。晏朝而退。孔子聞之曰。誰謂由也而不知禮乎。

此節極贊禮之道大而行之存乎其人。郊事上帝。大禮無文。敬之至也。宗廟之祭。奉先思孝。仁之至也。親

喪之禮哀痛迫切忠之至也附身附棺服器必備事
死如生仁之至也賓客交際朝聘燕享皆用幣帛利
以爲和義之至也仁愛義敬而禮所以履之愛敬無
禮則仁義不可見故觀仁義本于禮也甘能受五味
之和白能受五色之采如人有誠實之資能爲學禮
之基苟浮華之習勝雖三千三百祇爲虛文故禮待
其人而後行也詩三百皆可絃歌以爲祭祀燕饗之
用善學者授之以政則達使于四方則能專對何有
于獻酬之小節然徒誦之而已則三百曾不足以供
賓主之一獻蓋一獻亦須敬也一獻之敬可以饋食

不可以大饗大饗則終日百拜始成大饗之敬可序
賓主不可爲大旅祭百神曰旅周禮大宗伯國有大
故則旅上帝及四望禮至大旅備矣然非精誠之極
無文之敬不足以格天饗上帝禮至事天始極若何
輕議之季氏非忠信之人故行禮怠緩不敬所謂不
足一獻也子路恭敬趨事所謂可大旅也若至敬饗
帝惟聖者能之逮及也闇昧爽以前室事謂饋食薦
熟之事行于室也交手室謂外人將饌至戶戶內人
受之堂事謂薦腥薦爛之事行于堂也交手階謂外
人將饌至階階上人受之儀禮祭行于室饋尸于堂

獻尸于室。旅酬于堂。質明。天正明。晏朝。朝近。晚不逮于昏。所謂不麾蚤也。故孔子曰知禮。

按鄭氏謂大旅爲祭五帝。五帝之說出緯書。由五方五氣以義起名則可。若靈威仰。赤熛怒等名則誕矣。天運無方。方由地生。先王巡守所至。祭告上帝與月令四時迎氣于郊。隨方類祭。其實一天耳。古祭禮不可詳。朝踐饋食堂室等事皆据三禮文字散見。三禮自漢人授。自漢人解。雖有智者耳目錮于漢思覩上世末由已。室事堂事近于演明行。英罷始于煩。周官儀禮疑竇尤多。遽闕繼燭固非。禮內外交接急遽畢。

和言刻角
事。又豈禮乎。惟曰毋輕議禮。則知言哉。總之可言。不可行。行之一人一時。不可通之天下萬世者。皆非聖人之經。是則可以反說而得者耳。